

### **Oqaaseqaatit nalinginnaasut**

Ilinniagaqarnissamik siunertaqarluni aammalu allamik initaarnermut atatillugu illumi atortorissaarutini innaallagissamoortunik, pequtini natersuarnillu pisinermut atugassanik nammineerluni ileqqaarneq annertusarniarlugu siunnersuutigineqarpoq ileqqaakkanut taakkununga erniatigut tapiissutini akileraaruteqaataasussaangitsunik landskarsip tapiissuteqartarnissaa, tamatuma kingunerisaanik aningaaserivinni ileqqaakkat akileraarutitigut oqilisaaffigineqartut tamarmik erniatigut tapiiffigineqartalersillugit.

Aammattaaq siunnersuutigineqarpoq erniatigut tapiissutaasartup 4 pct.-iusup landskarsimit tunniunneqartarnerata maannamut ukiunut 10-nut sivisunerpaaffeqartinneqarsimasup killingata peerneqarnissaa, taamaaliornikkut erniatigut tapiissutaasartoq ileqqaakkat kontumi akileraarutitigut oqilisaaffigineqartumi uninngasuutigineqartillugit tunniunneqartartussanngorlugu.

Kiisalu siunnersuutaavoq aammattaaq aningaaseriviit Kalaallit Nunaanni immikkoortortaqaalersimasut, taamaalillutillu Kalaallit Nunaannut ilaannakortumik akileraartussaataalersimasut ileqqaakkanut akileraarutitigut oqilisaaffigineqartunut aaqqissuussanut toqorteriffigineqarsinnaanissaat.

Allannguutini taakkununga atatillugu nalunaarut atuuttoq, inatsimmi § 10 kiisalu aningaaserivinnut isumaqatigiissut, tak. inatsimmi § 2, aqqutigalugit nutarterneqassaaq, tassa ilaatigut erseqqissarneqassalluni ajunngitsorsiatut ernialinneqartut erniatigullu tapiissutit aatsaat tunniunneqarsinnaassasut ileqqaakkat, ajunngitsorsiatut erniat erniatigullu tapiissutit ilanngunnagit, siunertamut atorneqarpata. Tamatuma kingunerissavaa erniat erniatigullu tapiissutit siunertamut atorneqartariaqannginnerat. Aammattaaq ernianut tunngatillugu erseqqissarneqassaaq aningaasat ileqqaarneqartut siulliit tassaassammata tiguneqartut siulliit. Kiisalu aningaasat tunniunneqartarnerini uppernarsaatissatut piumasarineqartut nutarterneqassapput.

Oqaatigineqarsinnaavoq akileraarutitigut oqilisaaffigineqartumik aningaaserivinni aaqqissuussani ileqqaakkanut kontut 8. marts 2000-imi 1.738-ummata, katillutillu uninngasuutigineqarlutik 28.500.000 koruunit. Kontut uninngasuutigineqartullu amerliartornerini takussutissat inatsisissatut siunnersuummut ilanngussaq 1-itut ilanngunneqarput.

Inatsisissatut siunnersuutip taasarialimmik allaffissornermut sunniuteqarnissaa naatsorsuutigineqanngilaq.

Inatsissatut siunnersuutip aningaasatigut landskarsimut kommuninullu sunniutissai missilioruminaapput, ileqqaarnerulernissamilli siunertaq anguneqassappat tamakkiisumik kingunerisassai pisortat karsiinut iluaqutaassapput.

Qulaani taaneqartoq nalornigaluarlugu naatsorsuutigineqarsinnaavoq erniatigut tapiissutit ukiut ingerlanerini qaffagiartornissaat. Ukioq 2000-imi 0 kr.-nit, ukioq 2001-imi 0 kr.-nit, ukioq 2002-mi 50.000 kr.-nit aamma ukioq 2003-mi 100.000 kr.-nit, aamma takuuk ilanngusaaq 1. Aammattaaq GrønlandsBanken Sparbank Vest-ilu peqatigalugit 2000-imi ukiakkut paasisitsiniaanissami pilersaarutigineqartumi Akileraartarnermi Pisorta qarfiup aningaasartuutigiumaagassai 50.000 kr.-niusussatut naatsorsuunneqarput.

## **Aalajangersakkanut ataasiakkaanut oqaaseqaatit**

### *§ 1, nr. 1-imut*

Ilinniagaqarnissamut ileqqaarneq annertusarniarlugu siunnersuutaavoq uninngasuutigineqartut siunertamut atorneqartillugit ileqqaakkat erniatigut tapiissummik akileraaruteqaataasussaangitsumik landskarsimit tapiissuteqarfigineqartalernissaat. Siunnersuutigineqarpoq erniatigut tapiissutit, piffissami sumiluunniit ileqqaakkat tunngaviusumik erniaat ilanngullugit ukiumut 4 pct.-iisut annertutiginissaat.

Erseqqissarneqassaaq ilinniakkat tassaammata meeqqat atuarfiata avataani kingornalu "ilinniakkat" sivikinnerpaamik ukiumik ataatsimik sivisussuseqartussatut naatsorsuussat, aammali taama sivisutiginnikkaluarlutik ilinniakkamut inatsimmi pineqartumut allamut uiggiullugit ilinniakkat kiisalu ilinniakkat pilersaarusiugaasut, nalinginnaasumik sap.ak. ullut tallimat ulluunerani ingerlanneqartartut. Apeqqutaanngilaq ilinniagaqartoq ilinniartuunersiutinik, ilinniarnermi akissarsianik pisarnersoq pisanningsorluunniit.

Ilinniagaqartup nammineq qangatuulli aalajangissavaa kontumi uninngasuutit ataatsikkut tunniunneqassanersut imaluunniit piffissap ilinniagaqarfiup nalaani qaammatikkaartumik tunniunneqartassanersut, taakkuluunniit akuleriisillugit tunniunneqartassanersut. Aningaasat tunniunneqartut annertussusiat, piffissami ilinniagaqarfiusumi ilinniarnermut inuuniarnermullu aningaasartuutinut naleqqutikannersuunersoq aallaqqaammut nalilerneqassanngilaq.

Aalajangersakkami siunertarineqartup akerlianik iluanaarniutiginnittoqartillugu ileqqaakkat ataavartumik ilinniagaqarnissamik siunertaqarsimassanngillat, taamaassimappallu erniatigut tapiisoqassanani, soorluttaaq ajunngitsorsiatut erniat tunniunneqarsimagunik akileraaruteqaataasussaanningsinnerat atorunnaassasoq.

Ilinniagaqartup ilinniakkami aallartinneraniit ukioq ataaseq qaangiutinngitsoq kipitippagu, tamatumalu kingorna piffissap siviluallaap qaangiutinnginnerani

ilinniakkamik allamik, sivikinnerpaamik ukiumik ataatsimik sivilissusilimmik aallartitsinngippat aningaasat uninngasuutigineqartut ataavartumik ilinniagaqarnissamut atorneqartutut isigineqassanngillat, taamaattumillu ajunngitsorsiatut erniat pineqartarnerisuulli erniatigut tapiissutit akileraaruteqaataasussaanninnerat atorunnaassalluni.

*§ 1, nr. 2-mut 3-mullu*

Allannguinerup kingunerai.

*§ 1, nr. 4-mut*

Allannguinerup kingunerissavaa landskarsip aammattaaq, allamik initaarnermut atatillugu illumi atortorissaarutinik innaallagissamoortunik, pequtunik natersuarnillu pisinissamut ileqqaakkanut erniatigut tapiissummik akileraaruteqaataasussaannngitsumik, piffissami sumiluunniit ileqqaakkat tunngaviusumik erniaat ilanngullugit, ukiumut 4 pct.-iinik tapiissuteqartalernissaa.

*§ 1, nr. 5-imut*

Akiliinermiit siullermiit ukiut 10-t qaangiunneranni aatsaat landskarsip 4 pct.-inik erniatigut tapiissuteqartarnerata unittarnissaanik aalajangersakkap atorunnaarnissaa siunnersuutigineqarpoq, taamaalillutik erniatigut tapiissutit aningaasat ileqqaakkani akileraarutitigut oqilisaaffigineqartuni uninngasuutigineqarnerat tamakkerlugu tunniunneqartartussanngorlugit. Erniatigulli tapiissutaasartut aatsaat kontup sivikinnerpaamik ukiumi ataatsimi pioreersimaneratigut tunniunneqartarnissaat atuutiinnassaaq.

*§ 1, nr. 6-imut*

Allannguinerup kinguneraa.

*§ 1, nr. 7-imut*

Siunnersuutigineqarpoq aammattaaq aningaaserivinni Kalaallit Nunaanni aalajangersimasumik ingerlatsiveqartuni akileraarutitigut oqilisaaffigineqartumik ileqqaarnermut aqqissuussanik pilersitsisoqarsinnaanissaa, tassami aningaaseriviit taamaattut Kalaallit Nunaannut killilimmik akileraartussaataasussaammata, aammalu aningaasarsianit akileraarutit pillugit Inatsisartut inatsisaanni aalajangersakkat malillugit nakkutilliinissamut paasissutissiisussaataaannissamullu pisussaaffeqartussaammata.

*§ 1, nr. 8-mut*

Allannguinerup kinguneraa.

*§ 2-mut*

Inatsisartut inatsisaata ullormi 1. juni 2000-imi atortuulernissaa siunnersuutigineqarpoq.

Ilinniagaqarnissamut imaluunniit allamik initaarnermut atatillugu illumi atortorissaarutunik innaallagissamoortunik, pequtunik natersuarnillu pisinissamut ileqqaakkanut kontumi uninngasuutit 1. juni 2000-imi kingusinnerusukkulluunniit tiguneqarpata, landskarsip erniatigut tapiissutaa 4 pct.-iusoq tunniunneqartussaassaaq, aningaasat 1. juni 2000 sioqqullugu ikineqarsimanersut apeqqutaatinnagu.